



25. januar 2011

UPA2011/45

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Naalakkersuisut peqquneqarnissaannik Inatsisartut aalajangiiffigisassaattut siunnersuut Naalakkersuisut kingusinnerpaamik FM12-mi peqquneqassasut siunnersuusioqqullugit, taamaasilluni illup tunineqarnerani iluanaarummiik akitsuummik akiliissarnissaq eqquneqaqqullugu taarsigassarseriaaseq 20/20/60 atorlugu illut sanaat tunineqarneranni nalingata affaa aallaavigalugu, illup napparnerani pisortat taarsigassarsititsisartullu namminersortut taarsigassarsiissutaat sinnerlugit iluanaaruteqartoqarsimappat.**

(Inatsisartuni ilaasortaq Justus Hansen, Demokraatit)

**Tungavilersuut:**

Siunnersuutip matuma siunertaraa pisortat aningaasaleeqataaffigisaannik illuliorortoqartillugu iluanaarniapiluttoqartannginnissaa.

Inuiaqatigiittut siunertaraarput, sapinngisamik amerlanerpaat nammineq illoqalernissaat, taamaattumik isumassarsiatsialaavoq, illuliornermut atatillugu pisortat pitsaasunik taarsigassarsititsisinnanissaat. Taarsigassarsititsisarnernili taamaattuni ajornartorsiutaavoq, arlalissuarnik asser-suutissaqarmat, pisortanit taarsigassarsitinneqarluni illumik inissiarsuarnilluunniit sanaartortoq, illuliani naammassillugillu tuniseqqipallattarnera annertuumik iluanaaruteqarluni.

Demokraatini isumaqarpugut, inatsisiliortutut inatsisissat akuersissutigigatsigit siunertarinngillu-innaripput, iluanaarniapiluttartut illumik pisortat aningaasaleeqataaffigisaannik tunisinerminni iluanaarujussuuartarnissaat. Demokraatini isumaqarpugut, illut ukiut marluk siulliit qaangiuttullu tunineqassappat, taava illut sanaat tunineqarneranni nalingata affaa aallaavigalugu, illup napparnerani pisortat taarsigassarsititsisartullu namminersortut taarsigassarsiissutaat sinnerlugit iluanaaruteqartoqarsimappat, iluanaarutip akitsuutaanik akiliisoqartalissasoq.



Tamanna assersuusiorfigineqarsinnaavoq imaattumik: Illuliortoqarpoq pisortat namminersortullu taarsigassiissutaat 1.000.000 kroner atorlugit. Illup naammassineraniit ukioq ataaseq qaangiuttorlu illu tunineqarpoq 1.500.000 koruuninik akeqartillugu. Tunisinermi iluanaarutip 500.000 koruuniusut affaat pisortat aningaaseriviannut akiliutigineqassaaq.

Taarsigassarsititseriaatsit assigiinngitsut assersuutigalugu 20/20/60-ip il.il. siunertaraat innuttaasut nammineq illutaarnissaminut ikorfartorluarneqarnissaat, taamaattumik sussaangilaq aaqquissuussinernullu aserorterutaalluni, taarsigassarseriaatsinik iluanaarniapiluttartut atornerluisarneri. Taamaattumik Demokraatini isumaqarpugut piffissanngortoq, inatsisiliortartut akuliunnissaq, iluanaarniapiluttartut taarsigassarsititseriaatsinik atornerluisarneri unitsinniarlugit

### **Pisortanut aningaasaqarnikkut allaffissornikkullu kingunerisassai**

Nalilerneqarpoq siunnersuut pisortanut aningaasatigut kinguneqarumaartoq, inatsisip allanguutaa suliarineqartussammat, nutserneqartussammat il.il. kingornalu tusarniutigineqarluni. Inatsisissatut siunnersuutip suliarinera taamaasilluni allaffissornermi nukinnik atuisussaavoq. Isumaqartoqarporli 2011-mi aningaasanut inatsit aqutigalugu suliamut taamaattumut aningaasaliisoqareernikuusoq, kontu pingaarneq 70.00.01 Ineqarnermut, Attaveqarnermut Angallannernullu Pisortaqarfimmi allaffissornermut 2011-mi atugassat 600.000 koruuninik ilaneqarnikummata, ineqarnermut inatsisit naleqqussarnissaannut atugassanik. Una siunnersuut sulianut taakununga ilanngunneqarsinnaavoq.

### **Inuussutissarsiornermut aningaasaqarnikkut allaffissornikkullu kingunerisassai**

Siunnersuut aningaasatigut allaffissornikkullu namminersorlutik inuutissarsiortunut kinguneqassaaq, siunnersuuteqarnikkut sinertaammat, sanaartornerup iluani pilersinneqartartut iluanaarniapiluttartut iluanaarutaasa ilaannik akiliisitsisalernissaq kiisalu killilersuinissaq.

### **Innuttaasunut aningaasaqarnikkut allaffissornikkullu kingunerisassai**

Siunnersuut aningaasatigut allaffissornikkullu innuttaasunut imatut kinguneqassanngilaq, kisianni innuttaasut, illup iserterfigisinnaangorneraniit ukiut marluk iluanni landskarip aningaasaleqataaffigisaannik illumik tunisisut, annikinnerusumik pissarsisalissapput ullumikkut periarfissarititaasunut naleqqiullugu.



Taamatut oqaaseqarluta Naalakkersuisut akissutissaat qilanaarlunga utaqqissavara kiisalu partii-  
nit allanit oqaaserineqartussat aamma qilanaarlunga utaqqillugit.